



Broj: 01-50-1-15-57/09
Sarajevo, 8. juli 2009. godine

Z A P I S N I K

57. sjednice Predstavničkog doma Parlamentarne skupštine Bosne i Hercegovine, održane 8. jula 2009. godine

Sjednica je počela u 10 sati. Prisustvovalo je 39 poslanika. Odsustvo su opravdali: Jovan Todorović, Savo Erić i Momčilo Novaković.

Iz Vijeća ministara BiH sjednici su prisustvovali ministri: Rudo Vidović, Dragan Vrankić i Safet Halilović te zamjenici ministara Vilim Primorac, Srđan Arnaut i Slavko Marin.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, USAID PSP u BiH, Ambasade Velike Britanije te nevladine organizacije Centri civilnih inicijativa.

Predsjedavajući Beriz Belkić obrazložio je izmjene i dopune predloženog dnevnog reda. Zatim je pozvao predsjedavajuće komisija da sjednice održavaju nakasnije u ponedjeljak u sedmici u kojoj se održava sjednica Doma, a pogotovo kada su na dnevnom redu prijedlozi zakona u drugom čitanju.

Izneseno je više prijedloga za dopunu dnevnog reda, i to sljedećim redoslijedom.

Sadik Ahmetović predložio je da se dnevni red dopuni tačkom: Proglašavanje 11. jula danom sjećanja u cijeloj BiH na žrtve genocida koji je 1995. godine počinjen u Srebrenici.

Jerko Ivanković Lijanović predložio je da se u dnevni red uvrsti Zahtjev za razmatranje Prijedloga zakona o zaštiti domaće proizvodnje po hitnom postupku, u skladu s članom 127. Poslovnika. Uz ostalo, rekao je da bi ovaj zakon imao ograničen rok važenja, dok Ustavni sud BiH ne donese konačnu odluku o Zakonu o zaštiti domaće proizvodnje u okviru Sporazuma CEFTA, koji je privremeno stavljen van snage.

Milica Marković predložila je dopunu dnevnog reda tačkom: Zaključak o poništenju Zaključka Predstavničkog doma sa 52. sjednice o osnivanju posebne istražne komisije.

Željko Kuzmanović predložio je da se u dnevni red uvrsti tačka: Rasprava o nekonstituiranju vlasti u Gradu Mostaru.

Slavko Jovičić rekao je da će za jednu od narednih sjednica predložiti inicijativu u vezi s odlukama visokog predstavnika o smjenama policajaca iz Republike Srpske, kao i inicijativu vezanu za smjene zvaničnika zaposlenih u Državnoj agenciji za istrage i zaštitu.

Lazar Prodanović predložio je dopunu dnevnog reda tačkom: Rasprava o neprovođenju Odluke Ustavnog suda BiH u Federaciji BiH, vezano za zastavu i grb Federacije BiH.

Milorad Živković predložio je da se u dnevni red uvrsti tačka: Informacija o realizaciji zaključaka Predstavničkog doma donesenih prilikom usvajanja budžeta a vezano za trajno rješavanje problema smještaja institucija BiH i njihovo ravnomjerno raspoređivanje u oba entiteta.

U vezi sa iznesenim prijedlozima o dopunjavanju dnevnog reda, diskutirali su: Adem Huskić, Jozo Križanović i Željko Kuzmanović.

Drago Kalabić pitao je zašto u dnevni red nije uvrštena rasprava o efektima prenesenih nadležnosti s Republike Srpske na Bosnu i Hercegovinu, navodeći da su ispunjeni poslovnički uslovi za to. Također, kazao je da raspolaže neprovjerenom informacijom da je na dnevnom redu trebalo da bude i ostavka ministra sigurnosti BiH Tarika Sadovića pitajući da li je to tačno.

Predsjedavajući je rekao da je Inicijativa Kluba poslanika SNSD-a u vezi s uvrštavanjem u dnevni red tačke: Informacija o efektima (normativne, regulativne i institucionalne koristi) zakonskih rješenja kojima su prenesene nadležnosti s entiteta na nivo zajedničkih organa u Bosni i Hercegovini

upućena Ustavnompravnoj komisiji na razmatranje, te će biti uvrštena u dnevni red čim Komisija dostavi Mišljenje. U vezi s pitanjem o ostavci Tarika Sadovića, kazao je da je on i dalje ministar sigurnosti BiH sve dok Vijeće ministara BiH ne odluči drugačije.

Ponovo je vođena rasprava o prijedlozima za dopunu dnevnog reda u kojoj su učestvovali: Bakir Izetbegović, Drago Kalabić, Sadik Ahmetović, Azra Hadžiahmetović, Milorad Živković, Halid Genjac, Slavko Jovičić, Denis Bećirović, Selim Bešliagić, Jozo Križanović, Sadik Bahtić, Salko Sokolović i Remzija Kadrić.

Slavko Jovičić sugerirao je da predlagači odustanu od svojih inicijativa, pa kako ova sugestija nije prihvaćena, on je predložio da se u dnevni red uvrsti tačka: Vraćanje spomen-ploče i betonskih otisaka stopa Gavrila Principa na mjesto sarajevskog atentata.

Nakon pauze date na zahtjev Kluba poslanika SNSD-a, Drago Kalabić rekao je da, s ciljem doprinosa realizaciji planiranog dnevnog reda, poslanici Kluba SNSD-a odustaju od svojih prijedloga i da one ostaju kao prijedlozi za naredne sjednice, te je pozvao i ostale poslanike da povuku svoje prijedloge.

Sadik Ahmetović ostao je pri svom prijedlogu, a predsjedavajući je u vezi s prijedlogom Jerka Ivankovića Lijanovića rekao da je stav Kolegija da se nikakav sličan zakon ne može stavljati u proceduru dok Ustavni sud BiH ne donese konačnu odluku o Zakonu o zaštiti domaće proizvodnje u okviru Sporazuma CEFTA.

Nakon rasprave, pristupilo se glasanju o prijedlogu Sadika Ahmetovića za dopunu dnevnog reda. „Za“ je glasalo 26 poslanika (iz Federacije BiH 24, iz Republike Srpske dva), glasova „protiv“ nije bilo, a osam poslanika bilo je „suzdržano“. Predsjedavajući je konstatirao da nema dovoljne entitetske većine i da će Kolegij obaviti usaglašavanje o ovom prijedlogu i to u toku same sjednice ako to bude moguće.

Predsjedavajući je za 57. sjednicu Predstavničkog doma konstatirao sljedeći

D N E V N I R E D

1. Usvajanje Zapisnika 56. sjednice Predstavničkog doma;
2. Poslanička pitanja:
 - a) Komentari na dobivene odgovore,
 - b) Nova poslanička pitanja;
3. Zahtjev poslanika Sefera Halilovića, Vinka Zorića, Mirka Okolića, Šemsudina Mehmedovića, Denisa Bećirovića, Velimira Jukića i Adema Huskića za razmatranje Prijedloga zakona o izmjenama i dopunama Zakona o slobodi pristupa informacijama u BiH po skraćenom postupku, u skladu s članom 126. Poslovnika;
4. Prijedlog zakona o zabrani diskriminacije (drugo čitanje);
5. Prijedlog zakona o izmjenama i dopunama Zakona o osiguranju depozita u bankama BiH (drugo čitanje);
6. Prijedlog zakona o protuminskom djelovanju u BiH (prvo čitanje);
7. Prijedlog zakona o izmjeni Zakona o državnoj himni BiH (prvo čitanje);
8. Prijedlog zakona o izmjenama i dopunama Zakona o imunitetu BiH (prvo čitanje);
9. Prijedlog zakona o izmjenama i dopunama Zakona o plaćama i naknadama u institucijama BiH (prvo čitanje);
10. Izjašnjavanje o Prijedlogu zakona o izmjenama i dopunama Krivičnog zakona BiH, predlagači: poslanici Ekrem Ajanović, Remzija Kadrić i Adem Huskić (prvo čitanje);
11. Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o Graničnoj policiji BiH;
12. Godišnji izvještaj Visokog sudskog i tužilačkog vijeća BiH za 2008. godinu;
13. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1. 7. 2008. do 31. 12. 2008.;
14. Informacija o poplavama u Popovom polju, na rijeci Krupi i području Hutovog blata, s Mišljenjem Komisije za vanjsku trgovinu i carine;

15. Imenovanje člana Upravnog odbora Javnog radio-televizijskog servisa BiH iz srpskog naroda (Rang-lista kandidata Regulatorne agencije za komunikacije BiH);
16. Imenovanje članova iz Predstavničkog doma u stalnu delegaciju Parlamentarne skupštine BiH u Parlamentarnu skupštinu Mediterana;
17. Izvještaj komisije Kolegija o nastojanju za postizanje saglasnosti o prijedlogu poslanika Denisa Bećirovića da se u dnevni red sjednice Doma uvrsti tačka: Razmatranje zaključaka o štetnosti antidejtonskog i jednostranog djelovanja predsjednika Republike Srbije Borisa Tadića u državi Bosni i Hercegovini;
18. Izvještaj komisije Kolegija o nastojanju za postizanje saglasnosti o inicijativi poslanika Remzije Kadrića i Adema Huskića za raspravu na sjednici Doma o temi: Dostignuti nivo provođenja Općeg okvirnog sporazuma za mir u Bosni i Hercegovini;
19. Davanje saglasnosti za ratifikaciju:
 - a) Sporazuma između Vijeća ministara BiH i Vlade Države Izrael o ukidanju viza za nosioce diplomatskih i službenih pasoša,
 - b) Sporazuma između Vijeća ministara BiH i Vlade SR Njemačke o finansijskoj saradnji u 2006. godini,
 - c) Sporazuma između Vijeća ministara BiH i Vijeća ministara Republike Albanije o uzajamnim putovanjima državljana,
 - d) Dodatka uz Memorandum o razumijevanju između Vijeća ministara BiH i Vlade Kraljevine Holandije o Programu za saradnju s tržištima u nastajanju (PSOM);
 - e) Zasebnog aranžmana između Frankfurta na Majni i BiH, koju zastupa Ministarstvo finansija i trezora, kao i Federacije BiH, koju zastupa Federalno ministarstvo finansija, i Republike Srpske, koju zastupa Ministarstvo finansija Republike Srpske,
 - f) Konvencije o identifikacionim dokumentima pomoraca iz 2003. godine,
 - g) Konvencije o klauzulama o radu (javni ugovori), br. 94 iz 1949. godine, i Preporuka o klauzulama o radu (javni ugovori), br. 84 iz 1994. godine, Međunarodne organizacije rada,
 - h) Konvencije o zaštiti i korištenju prekograničnog vodotoka i međunarodnih jezera – Helsinki, 17. marta 1992. godine;
 - i) Konvencije o radu na nepuno radno vrijeme, br. 175 iz 1994. godine, i Preporuke o radu na nepuno radno vrijeme, br. 182 iz 1994. godine, Međunarodne organizacije rada,
 - j) Konvencije o sigurnosti i zdravlju u rudnicima, br. 176 iz 1995. godine, i Preporuke o sigurnosti i zdravlju u rudnicima, br. 183 iz 1995. godine, Međunarodne organizacije rada,
 - l) Konvencije o radu kod kuće, br. 177. iz 1996. godine, i Preporuke o radu kod kuće, br. 184. iz 1996. godine, Međunarodne organizacije rada;
 - m) Konvencije o privatnim agencijama za zapošljavanje, br. 181 iz 1997. godine, i Preporuke o privatnim agencijama za zapošljavanje, br. 188 iz 1996. godine, Međunarodne organizacije rada,
 - n) Konvencije o zaštiti materinstva, br. 183 iz 2000. godine, i Preporuke o zaštiti materinstva, br. 191 iz 2000. godine, Međunarodne organizacije rada;
 - o) Konvencije o sigurnosti i zdravlju u poljoprivredi, br. 184 iz 2001. godine, i Preporuke o sigurnosti i zdravlju u poljoprivredi, br. 192 iz 2001. godine, Međunarodne organizacije rada;
 - p) Konvencije o radu na moru (MLC) iz 2006. godine, Međunarodne organizacije rada,
 - r) Konvencije o radu u ribolovu, br. 188 iz 2007. godine, i Preporuke o radu u ribolovu, br. 199 iz 2007. godine.

Ad. 1. Usvajanje Zapisnika 56. sjednice Predstavničkog doma

Nije bilo rasprave o Zapisniku.

Zapisnik 56. sjednice usvojen je sa 20 glasova „za“ (iz Federacije BiH 15, iz Republike Srpske pet), jednim „protiv“ i bez „suzdržanih“ glasova.

Ad. 2. Poslanička pitanja

Odgovore su komentirali: Husein Nanić, Selim Bešliagić, Branko Dokić, Slavko Jovičić, Drago Kalabić i Mirko Okolić.

U okviru komentara na dobivene odgovore ranija pitanja su ponovljena, odnosno dopunjena sljedećim:

Husein Nanić:

„Da li je Vijeće ministara BiH utvrdilo Trogodišnji program javnih investiranja? Tražim dostavljanje programa kada ga Vijeće ministara BiH usvoji.“

Selim Bešliagić:

1. „Dobio sam odgovor na pitanje o Agenciji za kvalitet hrane. I po dobivenom odgovoru vidi se da sama Agencija radi u korist deficita BiH, drugim riječima lobira za uvoz. Od 2005. godine već pune četiri godine stagnira se s donošenjem pravilnika i ovdje sada moram da kažem da uz ovo tražim odgovor ko će snositi odgovornost za ovakvo stanje. Drugo - šta će Ministarstvo i sam ministar vanjske trgovine i ekonomskih odnosa BiH preduzeti da se ovo stanje popravi?
2. Tražim imena svih članova Upravnog odbora, direktora agencije i Savjetodavno vijeće, Naučno vijeće i Naučni odbor, te odgovor - da li su oni za ovo vrijeme primali naknade? Mislim da je to vrlo bitno pitanje, jer, evo, ako uzmete samo da je na vodama svake godine skoro uvoza sto miliona, to govori o, ja bih rekao, nekorektnom odnosu i neradu u ovakvim agencijama.“

Slavko Jovičić:

„Je li BiH jedina zemlja u svijetu koja retroaktivno primjenjuje Krivični zakon?“

Drago Kalabić:

„Šta će Vijeće ministara BiH uraditi povodom odluke Vijeća Regulatorne agencije kojom se plaća generalnog direktora Agencije povećava za 30%? Koji su mehanizmi da se obori odluka?“

Branko Dokić:

„Šta će Vijeće ministara BiH preduzeti da se odštetni zahtjev porodice Starovlah konačno riješi diplomatskim putem između BiH i snaga NATO-a? Ja vas molim da, iako nije poslovnički, omogućite da o ovom pitanju razgovaramo pred članovima Vijeća ministara BiH na sljedećoj zajedničkoj sjednici.“

Mirko Okolić zatražio je da se uputi urgencija za dostavljanje odgovora na njegova ranije postavljena pitanja.

Postavljena su nova poslanička pitanja kako slijedi:

Rifat Dolić:

1. „Da li raspolazete podacima o broju građana BiH koji i danas izvan BiH u zemljama širom svijeta borave sa statusom izbjeglica, koliki je broj takvih po pojedinim zemljama, gdje i koliki broj građana BiH i danas boravi u kolektivnim izbjegličkim centrima u Hrvatskoj, Srbiji i nekim drugim zemljama?
2. Šta država BiH i njene institucije vlasti preduzimaju u pravcu spašavanja i vraćanja imovine BiH, njenih firmi i građana u Srbiji, nakon što je Vlada Srbije produžila rok za rješavanje statusa ove imovine do 30.9.2009.?“

Jozo Križanović:

„Kada će Vijeće ministara BiH donijeti odgovarajući prijedlog mjera za ublažavanje ekonomske krize u BiH u skladu sa Zaključkom Predstavničkog doma BiH od 13. 5. 2009.?“

Branko Dokić:

„Kada će Parlamentarna skupština BiH ispoštovati svoj zaključak da će se „formirati radna grupa koja će izraditi Prijedlog zakona o izmjenama i dopunama Zakona o izmirenju obaveza po osnovu računa stare devizne štednje?“

Husein Nanić:

1. „Zašto se odredba člana 29. Zakona o putnim ispravama BiH, a koji se odnosi na rok važenja putne isprave, u praksi ne primjenjuje dosljedno?
2. Kada će u daljnju parlamentarnu proceduru uputiti isti ili novi zakon o denacionalizaciji?“

Šemsudin Mehmedović:

1. „Koliko je državljana Republike Hrvatske (iz tzv. Kninske krajine) upisano u matičnim uredima Republike Srpske u MK državljana BiH?
2. Koliko ih je upisano po osnovu rješenja?
3. Koliko ih je upisano bez ikakvog rješenja?
4. Ko je lice odgovorno za ovakvu djelatnost?“

Selim Bešliagić:

„Zbog uočenog neefikasnog rada institucija, koje sam dobio u odgovoru na pitanje o Agenciji za sigurnost hrane (sa 52. sjednice), tražim da se napravi analiza svih agencija i stepen njihove efikasnosti, kao mogućnost poboljšanja ukupne efikasnosti rada u njima.“

Adem Huskić:

„Koji pojedinci i po kojoj odluci su se educirali o trošku poreskih obaveznika ove zemlje (iz budžeta BiH)? Molim da se u odgovoru navedu imena ljudi i visina odobrenih sredstava u svim institucijama BiH.“

Remzija Kadrić:

„Koje aktivnosti Pravobranilaštvo BiH preduzima da se, u skladu sa Ustavom BiH, Sporazumom o pitanjima sukcesije, zakonom o zemljišnim knjigama, državna imovina, ranije uknjižena na SRBiH i RBiH, ponovo knjiži u zemljišne knjige u korist titulara države BiH?“

(I Remzija Kadrić tražio je da se urgira za dostavljanje odgovora na njegova ranije postavljena pitanja.)

Ad. 3. Zahtjev poslanika Sefera Halilovića, Vinka Zorića, Mirka Okolića, Šemsudina Mehmedovića, Denisa Bećirovića, Velimira Jukića i Adema Huskića za razmatranje Prijedloga zakona o izmjenama i dopunama Zakona o slobodi pristupa informacijama u BiH po skraćenom postupku, u skladu sa članom 126. Poslovnika

Predsjedavajući je dao uvodne napomene, nakon kojih nije bilo rasprave.

Zahtjev za skraćeni postupak usvojen je jednoglasno – sa 37 glasova „za“ (iz Federacije BiH 27, iz Republike Srpske 10).

Ad. 4. Prijedlog zakona o zabrani diskriminacije (drugo čitanje)

Predsjedavajući je u uvodnim napomenama rekao da je nadležna komisija usvojila sedam amandmana, a da je Mirjana Malić u plenarnoj fazi podnijela jedan amandman.

U okviru ove tačke diskutirali su Mirjana Malić i Niko Lozančić.

Amandman I. Mirjane Malić usvojen je sa 34 glasa „za“ (iz Federacije BiH 25, iz Republike Srpske devet), bez glasova „protiv“ i tri „suzdržana“ glasa.

Prijedlog zakona o zabrani diskriminacije usvojen je u drugom čitanju sa 35 glasova „za“ (iz Federacije BiH 25, iz Republike Srpske 10), bez glasova „protiv“ i jednim „suzdržanim“ glasom.

Ad. 5. Prijedlog zakona o izmjenama i dopunama Zakona o osiguranju depozita u bankama BiH (drugo čitanje)

Predsjedavajući je rekao da je Komisija za finansije i budžet usvojila Zakon u predloženom tekstu, te da u plenarnoj fazi nije bilo amandmana.

Nije bilo rasprave.

Prijedlog zakona o izmjenama i dopunama Zakona o osiguranju depozita u bankama BiH usvojen je u drugom čitanju sa 36 glasova „za“ (iz Federacije BiH 27, iz Republike Srpske devet), bez glasova „protiv“ i jednim „suzdržanim“ glasom.

Ad. 6. Prijedlog zakona o protuminskom djelovanju u BiH (prvo čitanje)

Predsjedavajući je dao uvodne napomene o Prijedlogu zakona.

U raspravi su učestvovali: Šefik Džaferović, Mirko Okolić, Slavko Jovičić, Selim Bešlić, Niko Lozančić, Vinko Zorić i direktor BHMAG-a Dušan Gavran.

Prilikom glasanja, sa 25 glasova „za“ (iz Federacije BiH 18, iz Republike Srpske sedam), sedam „protiv“ i pet „suzdržanih“ u prvom čitanju usvojen je Prijedlog zakona o protuminskom djelovanju u BiH.

Ad. 7. Prijedlog zakona o izmjeni Zakona o državnoj himni BiH (prvo čitanje)

Nije bilo rasprave nakon uvodnih napomena predsjedavajućeg.

Prilikom glasanja, „za“ je bilo 29 poslanika (iz Federacije BiH 27, iz Republike Srpske dva), glasova „protiv“ nije bilo a osam poslanika bilo je „suzdržano“. Predsjedavajući je konstatirao da nema dovoljne entitetske većine i da će Kolegij naknadno obaviti usaglašavanje o Prijedlogu zakona u prvom čitanju.

Ad. 8. Prijedlog zakona o izmjenama i dopunama Zakona o imunitetu BiH (prvo čitanje)

Predsjedavajući je dao uvodne napomene.

Nije vođena rasprava.

Dom je, s 29 glasova „za“ (iz Federacije BiH 20, iz Republike Srpske devet), jednim „protiv“ i šest „suzdržanih“ glasova, usvojio Prijedlog zakona o izmjenama i dopunama Zakona o imunitetu BiH u prvom čitanju.

Ad. 9. Prijedlog zakona o izmjenama i dopunama Zakona o plaćama i naknadama u institucijama BiH (prvo čitanje)

Nakon uvodnih napomena predsjedavajućeg, u raspravi su učestvovali: Slavko Jovičić, Vinko Zorić, Azra Hadžiahmetović, Rifat Dolić, Sadik Bahtić, Lazar Prodanović, Velimir Jukić i Remzija Kadrić.

Prijedlog zakona o izmjenama i dopunama Zakona o plaćama i naknadama u institucijama BiH usvojen je u prvom čitanju s 33 glasa „za“ (iz Federacije BiH 24, iz Republike Srpske devet), bez glasova „protiv“ i četiri „suzdržana“ glasa, čime je usvojen i zaključak iz mišljenja Komisije za finansije i budžet.

Nakon toga, Dom je, s 31 glasom „za“ (iz Federacije BiH 26, iz Republike Srpske pet), bez glasova „protiv“ i pet „suzdržanih“ glasova, usvojio prijedlog zaključka Rifata Dolića iznesen u raspravi.

Usvojeni zaključci glase:

- 1. Predstavnički dom Parlamentarne skupštine BiH zadužuje Vijeće ministara BiH da u najkraćem roku svim poslanicima u Domu dostavi pismo namjere koje su vlasti u BiH uputile Međunarodnom monetarnom fondu, a koje je osnova stand by aranžmana sa**

MMF-om, kao i informaciju o toku i rezultatima pregovora s MMF-om, a s ciljem pravovremenog informiranja poslanika.

2. Obavezuje se Vijeće ministara BiH da, u okviru daljnjih pregovora o kreditnim aranžmanima s MMF-om i drugim međunarodnim finansijskim institucijama, u roku od 30 dana, donese program ušteda i racionalizacije javne potrošnje u institucijama BiH u svrhu većeg doprinosa ukupnoj racionalizaciji javne potrošnje i pravednijoj raspodjeli tereta restrikcija u socijalnom sektoru, te održavanja i povećanja nivoa podsticaja za poljoprivredu, preduzetništvo i druge instrumente za borbu protiv krize i recesije u Bosni i Hercegovini.

(Zaključak br. 1. usvojen je na prijedlog Komisije, a zaključak br. 2. na prijedlog Rifata Dolića.)

Ad. 10. Izjašnjavanje o Prijedlogu zakona o izmjenama i dopunama Krivičnog zakona BiH, predlagači: poslanici Ekrem Ajanović, Remzija Kadrić i Adem Huskić (prvo čitanje)

Predsjedavajući je u uvodnim napomenama podsjetio da su predlagači Zakona insistirali da se obavi izjašnjavanje o ovom prijedlogu zakona, s obzirom da je rasprava okončana na 54. sjednici, održanoj 27.5.2009., a u međuvremenu je i Ministarstvo pravde BiH dostavilo mišljenje koje je traženo zaključkom sa pomenute sjednice.

Nije bilo rasprave.

„Za“ su glasala 23 poslanika (iz Federacije BiH 21, iz Republike Srpske dva), „protiv“ sedam i šest je bilo „suzdržanih“. Predsjedavajući je konstatirao da će Kolegij obaviti usaglašavanje o Prijedlogu zakona u prvom čitanju zbog nedovoljne entitetske većine.

Ad. 11. Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o Graničnoj policiji BiH

Predsjedavajući je dao uvodne napomene.

Nije bilo rasprave.

Izvještaj Zajedničke komisije usvojen je sa 35 glasova „za“ (iz Federacije BiH 26, iz Republike Srpske devet), bez glasova „protiv“ i jednim „suzdržanim“ glasom.

Ad. 12. Godišnji izvještaj Visokog sudskog i tužilačkog vijeća BiH za 2008. godinu

Predsjedavajući je dao uvodne napomene. Nije bilo rasprave.

Godišnji izvještaj Visokog sudskog i tužilačkog vijeća BiH za 2008. godinu usvojen je s 30 glasova „za“ (iz Federacije BiH 22, iz Republike Srpske osam), bez glasova „protiv“ i šest „suzdržanih“.

Ad. 13. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1. 7. 2008. do 31. 12. 2008.

Nije bilo rasprave nakon uvodnih napomena predsjedavajućeg.

Prilikom glasanja, s 34 glasa „za“ (iz Federacije BiH 24, iz Republike Srpske 10), bez glasova „protiv“ i dva „suzdržana“ glasa, usvojen je Izvještaj iz ove tačke s Mišljenjem Zajedničke komisije za odbranu i sigurnost BiH. Odobren je produžetak učešća u 2009. godini pripadnika Oružanih snaga, policijskih i državnih službenika BiH u operacijama podrške miru, sa izmjenama koje je predložila Zajednička komisija, koje se odnose na nivo učešća policijskih službenika u mirovnim misijama UN-a u **Liberiji (UMIL), Sudanu (UNMIS) i Kipru (UNFICYP)**. Nivo učešća nije identičan već odobrenom nivou za 2009. godinu i potrebno ga je uskladiti s istim. Bez izmjena odobren je produžetak za:

- **Posmatračku misiju UN-a Demokratska Republika Kongo (MONUC) – pet pripadnika Oružanih snaga BiH,**
- **deset oficira za rad u štabovima u misiji Snage međunarodne sigurnosne pomoći (ISAF) u Afganistanu i**
- **jedan oficir za vezu u Centralnoj komandi SAD-a (USCENTCOM) Tampa – Florida.**

Ad. 14. Informacija o poplavama u Popovom polju, na rijeci Krupi i području Hutovog blata, s Mišljenjem Komisije za spoljnu trgovinu i carine

Nakon uvodnih napomena predsjedavajućeg u raspravi su učestvovali: Martin Raguž, Slavko Jovičić i delegat u Domu naroda Slobodan Šaraba.

Informacija o poplavama u Popovom polju, na rijeci Krupi i području Hutovog blata, s Mišljenjem Komisije za vanjsku trgovinu i carine usvojena je jednoglasno - s 36 glasova „za“ (iz Federacije BiH 26, iz Republike Srpske 10). Time su usvojeni zaključci iz Mišljenja Komisije, koji glase:

1. **Zadužuje se Ministarstvo vanjske trgovine i ekonomskih odnosa BiH da do kraja 2009. godine, u saradnji s entitetskim ministarstvima (poljoprivrede, vodoprivrede i šumarstva), nadležnim entitetskim agencijama za vode te Elektroprivredom RS-a, odnosno HE Trebišnjica, Elektroprivredom HZHB i PHE Čapljina, definiraju, uspostave i intenziviraju postojeće nadgledanje i stalnu razmjenu podataka relevantnih za rad postojećih objekata sistema (vodostaji, protoci i sl.), po vrstama i rokovima.**
2. **Zadužuje se Vijeće ministara BiH da koordinira aktivnosti koje će preduzeti nadležna entitetska ministarstva na uspostavljanju stalne saradnje između agencija koje upravljaju sistemima voda, a posebno u periodima visokih vodostaja na području riječnih slivova u BiH.**
3. **Zadužuju se elektroprivredna preduzeća da dostave sve relevantne podatke o radu u razmatranom periodu poplava nadležnim entitetskim agencijama i ministarstvima, koji će te podatke dalje proslijediti zainteresiranim stranama. Također se zadužuju elektroprivredna preduzeća da izrade pravilnike - pogonska uputstva o upravljanju vodama u skladu s važećim zakonodavstvom.**
4. **Budući da je sistem HE na Trebišnjici projektovan kao cjelina i sada funkcioniра u tri države, čime je narušeno tehnološko jedinstvo sistema te ekonomsko-energetski odnosi između preduzeća HE na Trebišnjici i PHE Čapljina kao i HE Dubrovnik, predlaže se da Ministarstvo vanjske trgovine i ekonomskih odnosa BiH pokrene inicijativu za rješavanje odnosa između elektroprivrednih preduzeća jer je rješavanje tih odnosa ključno za rješavanje ostalih pitanja i budućih planova.**
5. **Zadužuje se Vijeće ministara BiH da obaveže Ministarstvo vanjske trgovine i ekonomskih odnosa BiH da, u saradnji s nadležnim entitetskim ministarstvima, predloži program mjera za upravljanje sistemom voda za duži period. Potrebno je s privrednim subjektima iz tačke 4. pronaći najbolja rješenja i modalitete budućih aktivnosti hidroelektrana za ublažavanje eventualnih poplava, sa što manje posljedica na stanovništvo na navedenim i drugim područjima podložnim vremenskim nepogodama.**
Čestu pojavu poplava moguće je smanjiti samo dogradnjom sistema HE na Trebišnjici, odnosno izgradnjom novih akumulacija za transformaciju plavnih valova i izgradnjom novih elektrana.
6. **Imajući u vidu da je Sporazum o grantu Globalnog fonda za okoliš između Bosne i Hercegovine i Međunarodne banke za obnovu i razvoj, kao agencije za realiziranje sredstava Globalnog fonda za okoliš - Projekat upravljanja Neretvom i Trebišnjicom - stupio na snagu 25. 2. 2009. i da su sredstva namijenjena za realiziranje projekta već operativna, zadužuje se Ministarstvo vanjske trgovine i ekonomskih odnosa BiH da izvijesti Parlamentarnu skupštinu BiH o tome šta je do sada realizirano u okviru ovog projekta.**
7. **Obavezuje se Ministarstvo vanjske trgovine i ekonomskih odnosa BiH da, u roku od 90 dana, obavijesti Predstavnički dom o mjerama preduzetim na realizaciji zaključaka.**

Ad. 15. Imenovanje člana Upravnog odbora Javnog radio-televizijskog servisa BiH iz srpskog naroda (Rang-lista kandidata Regulatorne agencije za komunikacije BiH)

Predsjedavajući je u uvodnim napomenama kazao da je redoslijed kandidata na rang-listi sljedeći: Aleksandar Bogdanić, Zoran Popović, Dijana Račić i Nikola Vukolić i dodao da, ako prvi kandidat dobije većinu glasova, daljnjeg glasanja neće biti.

Dom je, s 27 glasova „za“ (iz Federacije BiH 22, iz Republike Srpske pet), tri „protiv“ i šest „suzdržanih“, za člana Upravnog odbora Javnog radio-televizijskog servisa BiH iz srpskog naroda imenovao **Aleksandra Bogdanića**.

Ad. 16. Imenovanje članova iz Predstavničkog doma u stalnu delegaciju Parlamentarne skupštine BiH u Parlamentarnu skupštinu Mediterana

Predsjedavajući je u uvodnim napomenama podsjetio da Predstavnički dom imenuje dva od ukupno tri člana delegacije, i to jednog iz pozicije, a jednog iz opozicije, pri čemu je jedan član žena. Na sjednici Proširenog kolegija usaglašeno je da se predlože Momčilo Novaković i Azra Alajbegović.

S 30 glasova „za“ (iz Federacije BiH 21, iz Republike Srpske devet), bez glasova „protiv“ i šest „suzdržanih“, u stalnu delegaciju Parlamentarne skupštine BiH u Parlamentarnu skupštinu Mediterana imenovani su **Momčilo Novaković i Azra Alajbegović**.

Ad. 17. Izvještaj komisije Kolegija o nastojanju za postizanje saglasnosti o prijedlogu poslanika Denisa Bećirovića da se u dnevni red sjednice Doma uvrsti tačka: Razmatranje zaključaka o štetnosti antidejtonskog i jednostarnog djelovanja predsjednika Republike Srbije Borisa Tadića u državi Bosni i Hercegovini

Predsjedavajući je podsjetio da Kolegij nije postigao saglasnost.

U drugom krugu glasanja, s 23 glasa „za“, devet „protiv“ (iz Federacije BiH jedan, iz Republike Srpske osam) i pet „suzdržanih“, usvojen je prijedlog poslanika Denisa Bećirovića da se u dnevni red sjednice Doma uvrsti tačka: Razmatranje zaključaka o štetnosti antidejtonskog i jednostarnog djelovanja predsjednika Republike Srbije Borisa Tadića u državi Bosni i Hercegovini.

Nakon usvajanja prijedloga, Milorad Živković predložio je da se odmah otvori rasprava o ovoj tački. Predsjedavajući je proveo glasanje o preostale dvije tačke dnevnog reda, nakon čega je vođena rasprava o navedenom prijedlogu Milorada Živkovića.

Ad. 18. Izvještaj komisije Kolegija o nastojanju za postizanje saglasnosti o inicijativi poslanika Remzije Kadrića i Adema Huskića za raspravu na sjednici Doma o temi: Dostignuti nivo provođenja Općeg okvirnog sporazuma za mir u Bosni i Hercegovini

Kolegij nije postigao saglasnost ni o ovoj inicijativi.

U drugom krugu glasanja inicijativa je usvojena s 29 glasova „za“, sedam „protiv“ (iz Republike Srpske) i jednim „suzdržanim“ glasom

Ad. 19. Davanje saglasnosti za ratifikaciju:

- a) Sporazuma između Vijeća ministara BiH i Vlade Države Izrael o ukidanju viza za nosioce diplomatskih i službenih pasoša,
- b) Sporazuma između Vijeća ministara BiH i Vlade SR Njemačke o finansijskoj saradnji u 2006. godini,
- c) Sporazuma između Vijeća ministara BiH i Vijeća ministara Republike Albanije o uzajamnim putovanjima državljana,
- d) Dodatka uz Memorandum o razumijevanju između Vijeća ministara BiH i Vlade Kraljevine Holandije o Programu za saradnju s tržištima u nastajanju (PSOM);
- e) Zasebnog aranžmana između Frankfurta na Majni i BiH, koju zastupa Ministarstvo finansija i trezora, kao i Federacije BiH, koju zastupa Federalno ministarstvo finansija, i Republike

- Srpske, koju zastupa Ministarstvo finansija Republike Srpske,
- f) Konvencije o identifikacionim dokumentima pomoraca iz 2003. godine,
 - g) Konvencije o klauzulama o radu (javni ugovori), br. 94 iz 1949. godine, i Preporuka o klauzulama o radu (javni ugovori), br. 84 iz 1994. godine, Međunarodne organizacije rada,
 - h) Konvencije o zaštiti i korišćenju prekograničnog vodotoka i međunarodnih jezera – Helsinki, 17. marta 1992. godine;
 - k) Konvencije o radu na nepuno radno vrijeme, br. 175 iz 1994. godine, i Preporuke o radu na nepuno radno vrijeme, br. 182 iz 1994. godine, Međunarodne organizacije rada,
 - l) Konvencije o bezbjednosti i zdravlju u rudnicima, br. 176 iz 1995. godine, i Preporuke o bezbjednosti i zdravlju u rudnicima, br. 183 iz 1995. godine, Međunarodne organizacije rada,
 - l) Konvencije o radu kod kuće, br. 177. iz 1996. godine, i Preporuke o radu kod kuće, br. 184. iz 1996. godine, Međunarodne organizacije rada;
 - m) Konvencije o privatnim agencijama za zapošljavanje, br. 181 iz 1997. godine, i Preporuke o privatnim agencijama za zapošljavanje, br. 188 iz 1996. godine, Međunarodne organizacije rada,
 - n) Konvencije o zaštiti materinstva, br. 183 iz 2000. godine, i Preporuke o zaštiti materinstva, br. 191 iz 2000. godine, Međunarodne organizacije rada;
 - p) Konvencije o sigurnosti i zdravlju u poljoprivredi, br. 184 iz 2001. godine, i Preporuke o sigurnosti i zdravlju u poljoprivredi, br. 192 iz 2001. godine, Međunarodne organizacije rada;
 - p) Konvencije o radu na moru (MLC) iz 2006. godine, Međunarodne organizacije rada,
 - r) Konvencije o radu u ribolovu, br. 188 iz 2007. godine, i Preporuke o radu u ribolovu, br. 199 iz 2007. godine.

Predsjedavajući je rekao da je Komisija za vanjske poslove dala pozitivno mišljenje o davanju saglasnosti za ratifikaciju sporazuma.

Jednoglasno (s 37 glasova „za“ – iz Federacije BiH 27, iz Republike Srpske 10) je odlučeno da se obavi jedinstveno glasanje o svim sporazumima.

Saglasnost za ratifikaciju sporazuma data je također jednoglasno - s 37 glasa „za“ (iz Federacije BiH 27, iz Republike Srpske 10).

Nakon toga, raspravljano je o prijedlogu Milorada Živkovića u vezi s tačkom 17. dnevnog reda. U raspravi su učestvovali: Azra Hadžiahmetović, Drago Kalabić, Branko Dokić, Denis Bećirović, Slavko Jovičić, Jozo Križanović, Ekrem Ajanović, Selim Bešliagić i Mirko Okolić.

Nakon rasprave, predsjedavajući je konstatirao da će ova tačka biti uvrštena u dnevni red neke od narednih sjednica Doma i podsjetio da su za 14. juli 2009. zakazane 3. posebna i 13. zajednička sjednica oba doma.

Time je realiziran dnevni red.

Sjednica je završena u 17,15 sati.

Sastavni dio Zapisnika je transkript 57. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSEDVAJUĆI
PREDSTAVNIČKOG DOMA
Beriz Belkić